

VENDIM
Nr. 159, datë 20.10.2020

**MBI FILLIMIN E PROCEDURËS PËR SHQYRTIMIN E KËRKESËS SË SHOQËRISË
“WENERG” SHA, PËR BARRËSIM TË ASETEVE (MAKINERI DHE PAJISJE), NË
FAVOR TË “OTP ALBANIA” SHA, PËR EFEKT TË RISTRUKTURIMIT TË KREDISË
PËR FONDET E PËRDORURA, ME QËLLIM FINANCIMIN E NDËRTIMIT TË
HEC “DARDHA 1”**

Në mbështetje të nenit 16; nenit 20 pika “a”, nenit 44, pika “1”, të ligjit nr. 43/2015, “Për sektorin e energjisë elektrike”; në zbatim të nenit 6; nenit 7 dhe nenit 8, të “Rregullores për procedurat e transferimit të aseteve nga të licencuarit”, të miratuar me vendimin e Bordit të ERE-s, nr. 119, datë 21.7.2016; pikës 1.3 dhe 1.6, të “Licencës për prodhimin e energjisë elektrike” të miratuar me vendimin e Bordit të ERE-s nr. 99, datë 17.6.2016, si dhe nenit 19, pika 1, germa “a” të “Rregullores për organizimin, funksionimin dhe procedurat e ERE-s”, miratuar me vendimin nr. 96, datë 17.6.2016, Bordi i Entit Rregullator të Energjisë (ERE), në mbledhjen e tij të datës 20.10.2020, mbasi shqyrtoi relacionin me nr. 109/8 prot., datë 15.10.2020, të përgatitur nga Drejtoria e Licencimit, Autorizimeve dhe Mbikëqyrjes, në lidhje me kërkesën e shoqërisë “Wenerg” sh.a., për lënien barrë të aseteve në favor të bankës “OTP Albania” sh.a.,

konstatoi se:

- Me shkresën e protokolluara në ERE me nr. 383/10 prot., datë 31.9.2020, shoqëria “Wenerg” sh.a., ka paraqitur kërkesën për miratim për barrësim të aseteve (makineri dhe pajisje të HEC Dardha 1, në favor të bankës “OTP Albania” sh.a.

- Shoqëria “Wenerg” sh.a, është mbajtëse e licencës së veprimtarisë së prodhimit të energjisë elektrike, me nr. 104, seria PV10K, miratuar me vendimin e Bordit të Komisionerëve të ERE-s nr. 51, datë 5.7.2010, për një periudhë 30-vjeçare dhe modifikuar me vendimin e Bordit të ERE-s nr. 11, datë 6.2.2012, për shkak të optimizimit të skemës hidroenergjetike duke përmirësuar projektin. Është mbajtëse edhe e licencës së tregtimit të energjisë elektrike me nr. 184, seria T12P, të miratuar nga ERE me vendimin nr. 137, datë 8.10.2012.

- Midis METE-s (sot MIE), në cilësinë e Autoritetit kontraktues dhe shoqërisë “*Compagnie Nationale du Rhone*” (CN’AIR) me cilësinë e koncensionarit, është lidhur kontrata e koncensionit të formës BOT, me nr. 6144 rep. dhe nr. 2021 kol., datë 18.8.2009.

Aplikimi plotëson pjesërisht kërkesat e parashikuara nga ERE në “Rregulloren për procedurat e transferimit të aseteve nga të licencuarit”, si më poshtë:

- Neni 7, pika 1, germat: “a”, “b”, “c”, “f”, “g”, janë plotësuar në mënyrë korrekte.

- Neni 7, pika 1, germa “h” (marrëveshje paraprake e nënshkruar midis palëve në një nga format e parashikuara nga ligji, për transferimin e aseteve). Plotësuar pjesërisht. Shoqëria duhet të depozitojë në ERE kontratën për rristurimin e kredisë që ka nënshkruar me OTP Bank, për të kuptuar më tepër rreth barrësimit të aseteve në këtë moment, për efekt të këtij rristurimi.

- Neni 7, pika 3. Subjektet koncensionare të licencuara, të cilët aplikojnë për miratimin e transferimit të aseteve në ERE, duhet të shprehin në formë të shkruar në marrëveshjen e transferimit të aseteve, detyrimet me të cilat ngarkohen për shkak të marrëveshjes së koncensionit e pjesët që transferojnë te përfituesi. Kjo përfshin edhe informimin e organit shtetëror të autorizuar (MEI) në lidhje me qëllimin e transferimit të aseteve. Plotësuar.

- Neni 7, pika 4. Kërkesa, informacioni dhe dokumentacioni i bashkëlidhur kërkesës, duhet të jenë të nënshkruar nga personi ose personat e autorizuar nga shoqëria që kanë kompetencën për përfaqësimin e personit, mbajtës licence, apo të kandidatit të propozuar. Plotësuar.

- Neni 7, pika 6. Pjesë të dokumentacionit që i licencuari kërkon të mos jenë të hapura për publikim, duhet të specifikohen në kërkesën për transferim, së bashku me arsyet e mosbërjes publike të tyre. Plotësuar.

- Qëllimi i kësaj rregullore në zbatim të përcaktimeve të pikës 1 dhe pikës 2, të nenit 44, të ligjit nr. 43/2015, “Për sektorin e energjisë elektrike”, të ndryshuar, është përcaktimi i procedurës dhe dokumenteve të nevojshme për miratimin e kërkesave të të licencuarve për shitje, dhënie me qira, transferim, hipotekim, barrë ose çfarëdolloj disponimi tjetër të pajisjeve ose aseteve fikse të të licencuarit, të përdorura për kryerjen e veprimtarisë së prodhimit, transmetimit, shpërndarjes së energjisë elektrike.

- Subjekti koncensionar “Wenerg” sh.a., me kontratë koncensionale të formës BOT, me nr. 6144 rep. dhe nr. 2021 kol., datë 18.8.2009, bazuar në deklaratimet e bëra në pasqyrat financiare lidhur me pasqyrimin e aseteve, ka njohur asetet sipas modelit të aktivitetit jomaterial, në zbatim të përcaktimeve të SNK 13 dhe SKK5, por mbështetur në KIRFN 12, subjekti koncensionar duhet të marrë paraprakisht autorizim prej koncensiondhënësit, (ish METE-s, sot Ministria e Infrastrukturës dhe Energjisë (MIE)) për lënien peng të aseteve, meqenëse kontrolli i koncensiondhënësit mbi çdo interes të mbetur të konsiderueshëm do të kufizonte aftësinë praktike të operatorit (subjekti koncensionar) për të shitur ose dhënë peng infrastrukturën.

- Nisur nga të dhënat e pasqyrave financiare, do t’i kërkohej aplikuesit shpjegime në lidhje me aftësinë paguese për shlyerjen e kredisë, si dhe llojin e aseteve për të cilat i drejtohet ERE-s më këtë kërkesë për miratim të transferimit të tyre, për qëllime të garantimit të kontratës së kredisë.

- Nga rakordimi me Drejtorinë e Financave, rezulton se shoqëria “Wenerg” sh.a. i ka kryer të gjitha pagesat e rregullimit ndaj ERE-s

Për gjithë sa më sipër cituar, Bordi i ERE-s,

VENDOSI:

1. Të fillojë procedurën për shqyrtimin e kërkesës së shoqërisë “Wenerg” sh.a., për barrësim të aseteve në favor të “OTP Albania” sh.a., për efekt të ristrukturimit të kredisë, për fondet e përdorura me qëllim financimin e ndërtimit të HEC “Dardha 1”.

2. Kërkuesi të dokumentojë dhe argumentojë:

- a) mundësinë financiare për shlyerjen e kredisë;
- b) marrjen e qëndrimit të MIE-s në lidhje me transferimin e aseteve të deklaruara në këtë aplikim;
- c) marrëveshjen paraprake të kredisë së dakordësuar për qëllime të këtij aplikimi.

3. Drejtoria Juridike dhe Zgjidhjes së Mosmarrëveshjeve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohej rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti